

## Ratchis e Astolf: duchis e rês

Ratchis e Astolf, fiis di Pemon, a àn di jessi nassûts ae fin dal secul VII, denant che lôr pari al diventàs duche dal Friûl (705): in fats sul in prin dal so guvier Pemon al istituì, par lôr e pai fiis dai nobii langobarts disterminâts dai Slâfs tal macili di Ferdulf, une sorte di comunitât scolastiche. Al è pussibil che plui tart a sedin stâts ae cort di Liutprant e che a vebin inressût la lôr formazion sot la guide dal gramatic Felîç, che al insegnave a Pavie e che al veve gjoldût de stime e dal sostegn dal re Cunipert.

I doi fradis a vevin di jessi une vore diviers: ardôs e valorôs in vuere ducj i doi e cetant religjôs. Ma Ratchis al jere bon di anim, puartât aes conciliazions e par nuie ambiziôs. Biel che so fradi Astolf al jere mastin e risolût, pôc ben disponût viers il mont latin. Cussì al timp de muart dal re Liutprant a jerin za considerâts, tra la alte nobiltât langobarde, come i referents des dôs opuestis corints di pinsîr: Ratchis dal partît catolic, favorevul ae pâs cui Romans; Astolf dal partît nazionâl, che al smirave a mandâ vie i Bizantins e a creâ in Italie un sôl ream langobart.

Liutprant al nomenà Ratchis duche dal Friûl, cuant che al metè de bande so pari Pemon, e graziis ae sô intermediacion al tornà in buinis cul vieri rebel. Chest al sucedè pôc prime dal 740. Dal no lunc guvier di Ratchis in Friûl nus restin pôcs ats cognossût. Une vitoriose spedizion tal Cragn cuintri i Slâfs, la partecipacion ae vuere di Liutprant cuintri Tasamont di Benevento e cuintri i Romans siei aleâts, il sostegn di lui dât a savints e artiscj, so redut a Pauli Diacun, che al fo il so conseîr preferît. Testemoneance di dut chest la cjatìn intune forme di art origjinâl e rafinade, che e je in mò vuê rapresentade a Cividât inte are che Ratchis al dedicà ae memorie dal pari Pemon.

Al è di crodi che in chest timp il duche al fos bielzà maridât: la sô femine, Tassie, e jere – al semee – di gjarnazie latine e di jê Ratchis al ve almancul une fie.

Tal 744, muart Liutprant, e mandât vie il so sucessôr Ildeprant, Ratchis al fo elezût re dai Langobarts e al lassà Cividât e il ducât intes mans di so fradi Astolf, stralozant a Pavie. La sô elezion e segnave cussì la vitorie dal partît catolic, oltri che a rapresentâ une linie di continuitât politiche cul re defont. In fats il gnûf re al ratificà daurman il pat di tregue par vincj agns za firmât dal pape e di Liutprant. Daûr di cheste linie di condote al fo larc cu lis donazions e lis concessions a favôr des glesiis e des istituzions rezudis dai Latins. Ma chel altri partît al jere simpri potent: i duchis di Benevento e di Spoleto, che indi jerin cjalts sostenidôrs, si ribelarin a Ratchis. Par efiet di chestis pressions, o par cualchi provocacion de bande dai Bizantins, tal 749 Ratchis al cjapà lis armis e al invadè Pentapoli. Inalore il pape Zacarie al repetè il mût di fâ che Gregori II al veve metût in vore cun Liutprant: si presentà alî dal re che al stave ret Perugia, e cun preieris e minacis di cjastiis divins lu induchè no dome a interrompi la vuere, ma ancje a rinunziâ ae corone e a ritiràsi intun munistîr. Ratchis al le a sierâsi inte badie di Montecassino, dulà che si cjatave come frari un altri re, Carliman de Austrie. La regjine Tassie si ritirà invece cu la fie tal convent de Plumbariola, che jê stesse e veve fondât.

Sul tron langobart al sucedè a Ratchis, cun ben altris proponiments, il fradi Astolf che, come prin at di guvier, al anulà lis donazions aes glesiis fatis di so

fradi e al tornà a inviâ la vuere, cuistant in pôc timp Ravenna (751) e metint fin par simpri ae dominazion bizantine inte Italie di Sore. Po al le indenant cuistant il ducât ribel di Spoleto e fasint simpri plui pression sul ducât roman. Ambadadis dal pape e dal imperadôr Costantin no otignirin nuie. Il pape inalore al scjavalcjâ lis Alps par lâ a domandâ jutori al re dai Francs Pipin. Di chest viaç e dai negoziâts di Quierzu al cjatà la sô prime origjine il podê temporâl dai papis e, cu le aleance francje-papâl, si creà une situazion politiche gnove, destinade a vê consequencis in chê volte imprevedibilis pe Italie e pe Europe interie.

Astolf si rindè cont de gravitât di chescj fats. Al refudà ogni tentatîf di acuardi cui Francs e, tal Istât dal 754, al le cence pôre incuintri al esercit di Pipin, che al jere vignût jù in Italie. Al fo cjapât aes spalis e batût a Susa, e po obleât a ritirâsi a Pavie, che e vignì assediade. Inalore al tratà la pàs, che lu obleà a tornâ ducj i teritoris ocupâts e a prometi di no atacâ plui la Glesie di Rome. Dut câs, cuant che il re dai Francs al jere tornât di là des monts, Astolf cuntun grues exercit al jere tornât di là des monts, Astolf cuntun grues exercit si presentà sot lis muris di Rome (756). Ma nol olsà a jentrâ inte citât, contentantsi di domandâ, cu lis minacis, che si rindès. In cheste maniere al lassà al pape il timp di podê informâ il re dai Francs de situazion intrigose che si jere tornade a meti adun.

Cussì pôcs mêis daspò i Francs a tornarin jù in Italie pe stesse strade che a vevin bielzà fate. Inte vuere che e vignì daûr si scuintrarin cun viemence cuintri Astolf, e lu vincerin une altre volte, obleantlu a lâ a parâsi inmò a Pavie, che e tornà a jessi assediade. In fin i imponerin une seconde pàs, une vore plui dure de prime. Astolf al scugnì acetâ dut, oltri a un pesant tribût di paiâ ogni an e une sorte di dipendence dal re Franc. A cheste disfate disastrose, e ae fin impreteribil dai siei progjets e des sôs ambizions, Astolf al sorevivè dome pôcs mêis: al murì tal mêis di Dicembar daspò (736) cence lassâ erêts.

Ae sô muart si inviarin gnûfs contrascj pe corone e, mentri i Langobarts de Toscane a sielzerin a sucedii il lôr duce Desideri, ve che il frari Ratchis, dal sigûr clamât dai duchis de Italie di Sore, al lassave il convent di Motecassino e al tornave a comparî a Pavie, dulà che, cun facilitât, al vignì elezût re pe seconde volte.

Ma la situazion dal ream langobart e jere cetant mudade: bisugnave fâ i conts cul re dai Francs e cul pape, che al manovrà in maniere tâl di tornâ a mandâ Ratchis a sierâsi inte cele dal so convent. Ae fin i Langobarts a scugnirin acetâ come re Desideri e Ratchis al disparì par simpri de sene.

(Josef Marchet – da “Friuli uomini e tempi” test ridusût e voltât par furlan par cure de redazion Ladins dal Friûl – Avrîl 2014)